

Ataatsimiinnerup ammarneqarnera

(Inatsisartut Siulittaasuut)

Inatsisartut 2016-imi upernaakkut ataatsimiinnerat maanna ammarneqarpoq.

Nuannaarutigeqaara Inatsisartunut ilaasortaqaatika Naalackersuisullu upernaakkut ataatsimiinnermut matumunnga maanga ataatsimiittarfitsinnut ullumi tikilluaqqusinnaagakkit. Oqaluuserisassat pingaarutillit oqaluuserisussaavagut, neriutigaaralu suleqatigiilluarnitsigut angusaqarfiulluartumik oqaluuseriumaarivut.

Iisimatitsissutigissavara Inatsisartunut Naalackersuisunullu ilaasortat tamarluinnangajammik ataatsimiinnerup ammarneqarnerani najuummata. Inatsisartunut ilaasortaq Mimi Karlsen najuussinnaangikkallarpoq aprilip ulluisa 15-iata tungaanut sulinnigiffeqarnissaa Siulittaasoqarfimmit akuerineqarsimammat.

Inatsisartunut ilaasortat, Anders Olsen aamma Vivian Motzfeldt, sila pissutigalugu suli apuutinngillat.

Ataatsimiinnermut matumunnga Inatsisartut ataatsimiittarfianni maani piffissanik ataatsimiiffiusartussanik nutaanik Siulittaasoqarfik eqqussivoq. Ukiopassuannagortuni Inatsisartut ataatsimiinneri ualikkut ataatsinut aallartittarsimapput, marlunngorneq, pingasunngorneq sisamanngornerlu ataatsimiiffiusarlutik. Upernaakkut ataatsimiinnermi matumani sapaatip akunnerani ullut nalinginnaasut tamarmik ataatsimiiffiusassapput, ataatsimiinnerit ullaakkut qulinut aallartittassallutik ualikkullu marluk tungaanut ingerlassallutik. Piffissanik ullunillu ataatsimiiffiusartussanik allanngortitsineq siulittaasoqarfimmit ingerlaavartumik nalilersorneqartarumaarpoq.

Taamatuttaaq aalajangerneqarsimavoq Inatsisartuni sulineq pappiarartorfiujunnaariartuaassasoq. Tamatumani alloriarnertut siullertut siunissami oqaluuserisassanut nassuiaatit kiisalu partiit oqaaseqartuisa oqaaseqaataat taamaallaat qarasaasiakkut agguanneqartalissapput ingerlaannarlu nittartakkatsinni takuneqarsinnaasassallutik.

Taamatut oqaaseqarlunga najuuttut tikilluaqqoqqippakka. Neriuppunga ataatsimiinnivut pitsaasumik inerititaqarfiusumillu ingerlakkumaarivut, ataatsimiinnermilu anguniakkavut angujumaarivut.

Taamatut oqaaseqareerama oqaluuserisassani immikkoortup tullianut ingerlaqqissinnaavugut.